

SEDIA UNTUK DISAMPAIKAN

Duta James Keith

Pusat Serantau Asia Tenggara Bagi Mencegah Keganasan

Kuala Lumpur

22 April 2008

Penyerahan Bahan Rujukan Cegah Keganasan

Duta Dato' Hussin Nayan

Yang Berbahagia Datuk Iskandar Sarudin, Timbalan Setiausaha Agung (III), Kementerian Hal Ehwal Luar Negara

Yang Berbahagia Dato' Zainuddin Yahya, Setiausaha Bahagian Kanan, Bahagian Amerika, Kementerian Hal Ehwal Luar Negara

Tuan-tuan dan Puan-puan

Para hadirin yang dihormati sekalian

Selamat pagi. Terima kasih atas sambutan yang diberikan kepada saya pada hari ini. Satu-satunya kelebihan tugas saya ini adalah peluang untuk menghulurkan tangan kepada rakan-rakan sepejuangan. Di SEARCCT, sudah pastinya kita berada di kalangan rakan-rakan.

Semasa SEARCCT ditubuhkan pada tahun 2003, Amerika Syarikat juga turut berada di sini. Kami telah memberikan galakan dan kerjasama dari mula lagi. Perang terhadap keganasan adalah suatu tanggungjawab global dan kami amat kagum dan berpuas hati melihat Malaysia memainkan peranan untuk menerajui pembangunan kemampuan untuk memerangi keganasan serantau. Saya berbangga kerana Amerika Syarikat telah menyumbang lebih 40% daripada kursus-kursus di SEARCCT sepanjang beberapa tahun ini. Dengan kerjasama Amerika Syarikat, SEARCCT telah melatih para pegawai di Asia Tenggara berkaitan tajuk-tajuk seperti keselamatan maritim, bio-keganasan, dan siber-keganasan. Ini merupakan jenis kerjasama yang dibayangkan dalam Pengisytiharan Kerjasama bagi Memerangi Keganasan Antarabangsa yang ditandatangani oleh A.S. dan Malaysia pada tahun 2002.

Pada hari ini, saya amat berbangga untuk mengumumkan satu lagi pencapaian dalam kerjasama ini. SEARCCT telah bekerja keras untuk mengadakan sebuah perpustakaan yang mampu menyokong penyelidikan tentang insiden dan aliran cegah keganasan. Pengumpulan portfolio dokumen yang khusus

seperti ini bukan suatu kerja yang mudah. Saya bersuka cita mengumumkan bahawa Amerika Syarikat juga akan memberikan komitmen kami kepada rakan-rakan kami di SEARCCT. Pada pagi ini, saya akan menyerahkan suatu koleksi bahan untuk membantu mereka merealisasikan matlamat tersebut. Para penyelidik dan pegawai yang bekerja di SEARCCT kini mempunyai satu set buku dan bahan rujukan anugerah bernilai lebih RM15,000. Koleksi ini mengandungi judul-judul seperti *Global Terrorism: the Complete Reference Guide*, *The UN and Regional Organizations in the Fight against Terrorism*, dan *The Reference Shelf: Homeland Security*. Bahan rujukan yang lebih umum seperti *Atlas of Global Development* dan *Gale Encyclopedia of Everyday Law* juga disediakan.

Kami membuat sumbangan ini kerana kami yakin dengan hasrat dan ikrar SEARCCT untuk menyumbang terhadap masa depan yang bebas keganasan. Ini merupakan matlamat yang sangat mencabar dan memerlukan penyertaan jangka panjang daripada semua pihak di seluruh dunia. Saya percaya bahawa ini adalah suatu matlamat yang paling penting pada hari ini. Selagi masih wujud masalah keganasan, maka selagi itulah kita mesti meneruskan usaha untuk mengehadkan, dan akhirnya melenyapkan sebarang ruang bagi para pelampau beroperasi di seluruh dunia.

Kini sudah lima tahun SEARCCT menjalankan operasinya. Saya mengucapkan tahniah kepada SEARCCT yang akan menyambut ulang tahun tersebut pada bulan Julai ini. Di sini, saya ingin menyeru kepada Duta Hussin Nayan dan pasukannya supaya membuat penilaian dan pengesahan semula wawasan dan iltizam SEARCCT. Banyak lagi yang perlu dilakukan. Pihak Amerika Syarikat berharap akan terus berganding bahu dengan SEARCCT bagi menjayakan usaha tersebut.

Terima kasih.